



33899/B

ADV

VIRVM

ILLVSTREM ET EXCELLENTISSIMVM,

DN. CONRADVM BAR-
TOLDVM BEHRENS,
MAGNAE BRITANNIAE REGIS
ARCHIATRVM, HILDESIENSIVM
MEDICVM AC SENATOREM et pl.

DE NOVIS ET EXOTICIS

THEE ET CAFE
SVCCEDANEIS,

Botry Mexicana Ambrosioide, Am-
brosia Artemisiae foliis Malab. Capraria
Peruviana Agerati foliis, five Thee de Lima, Her-
ba de Paraguay, Cafe a la Sultane
et Oleo Siree aliisque,

DISSERTATIO EPISTOLICA
MICHAELIS FRIDERICI LOCHNERI,
Archiatr. Caesar.

me impulit occasio, paucis accipio.

[1717]



VIR

ILLVSTRIS atque EXCELLENTISSIME.

Tanta apud me est Nominis Tui veneratio, ea officiorum, vel potius beneficiorum. Tuorum in promovenda Medicorum ex Statuis et Numis, quam meditor, Historia, recordatio, ut nihil ardentius quam gratam mentem publice testandi occasionem optaverim. Cum autem maximum, quod nos intercedit, locorum intervallum, illam haecenus invideret, hoc quod nunc cernis literarium munusculum Nomini Tuo inscribendum constitui, ne diutius ingrati, vel saltem parum grati, animi merito postularer, aut neglecti cultus et officii jure arguerer. Nec convenientius ulli mittere possem, quam Tibi, ERVDITISSIME BEHRENS, eo quod in *Selectis Tuis Diaeteticis*, opere certe aureo, cui in hoc scribendi genere vix ullus Medicorum tam laudatas adhibuit curas, sectionem destinaveris peculiarem *assumptis voluptuariis inscriptam*, cui tanquam messi largissimae pagellarum mearum levidenses conatus adjici, vel si mavis operis *TVI* purpurae, lacinias has adjungi patiaris. Quae vero scribendi me impulerit occasio, paucis accipe.



Miscrae

58700(5)

Miserat huc e vicinae Bavariae Societatis Jesu Collegio Botanophilus ad Amicum, quo cum ipsi literarium intercedit commercium, Plantam, quam pro *vero Thee Sinensi* venditabat; cujus seminis ex hoc Regno a Missionariis laudatae Societatis inibi degentibus ipsi copia facta, quod terrae commissum plantam hanc produxisset. Cum rerum exoticarum studio me teneri nosset, qui plantam huc missam acceperat, ad aedes meas perlata, quid de incognita hac sentirem, sciscitabatur. Cum que illa plane nihil cum Thee Sinensi, cujus suboles esse credebatur, commune haberet, fucum ipsi factum esse referebam, quippe Botry similior, cujus semen uvae viniferae instar racematum caulibus adnatū.

Ne tamen soli mihi sapere viderer, ad amicissimum Volkammerum, qui hisce in dubiis mihi pro oraculo, mittebam, qui planta visa statim, risui vix sibi temperans, toto coelo aberrant, ajebar, qui Thee Chinense te credunt, et ex ejus semine productum volunt, quippe quod per aliquot tantum septimanas aptum, ut terrae mandetur, et progerminet, quo dicto plantam laete in horto ejus propullulantem monstrabat, eamque remittens Ambrosiam pronuntiabat Mexicanam, sive potius Botryn Mexicanam Ambrosioidem Casp. Bauh. in Pinace, aut Atriplicem suaveolentem Americanam Morisonii. H. 2. quam foliis aemulatur Atriplex argentea dentata Gurassavica solertissimi B. Hermannii Paradis. Batav. p. 100. uno verbo Epazotl Hernandez, sive atriplicem odoratam Mexicanam Nard. Ant. Recchi in Plant. Mexican. Historia Lib. V. c. 32. quam sequentibus descripsit et delineari fecit: Epazotl seu planta odorata herba est odora, folia ferens oblonga crenata et rubescentia; (Terentius in potis rubra pronuntiat et admodum similia atriplici sive Botryi) Caules cubitales, spicatum semen, ac radices surculose. Nasceitur in calidis temperatisque regionibus, coliturque in hortis nonnullorum commodatum gratia. Acris est, odora, et tertio ordine calefaciens; edulis etiam, cruda coctave; et adjecta condimentis corroborat.

Transmissa mihi alia sub hoc nomine, quam plantam jam flaccidam examini subjiciens, et corrugata folia profundius

laciniata explicans, yztecum patli *Hernand. Mexic. Hist.* p. 446. foliis Artemisiae candicantibus, sive florem Artemisiae viridem deprehendi, forte Ambrosiam illam elatiorem foliis Artemisiae atrovirentibus asperis odoratis non lanuginosis, quam inter lapides prope fluvium, de Rivier dictum, crescere necnon in aliis locis mediterraneis Insulae Jamaicae observavit *Illustrissimus Hans Sloane*.

Revocabant plantae hae haecenus recensitae, Botrys nempe Ambrosioides et Ambrosia Artemisiae foliis, illud *Dioscoridis* in animum: Cappadoces Botryn Ambrosiam, Artemisiam vocasse; *Pliniumque* pariter Ambrosiam cum Artemisia confudisse. Absit tamen, ut defendam, his Auctoribus aliquid de Plantis Mexicanis suboluisse.

Americanas et Mexicanas has plantas in orientali quoque India progerminare, testis est *Illustriss. Hort. Malab. Auctor* T. X. p. 89, Fig. 45. sub nomine Katu-tsjetti-pu, quod barbaricum nomen, Ambrosiam Malabaricam Artemisiae folio odoratissimo floribus flavis interpretatur amplissimae dignitatis Commelinus. Datur quippe et Ambrosia elatior Artemisiae foliis inodori, quam maritimam plantam e seminibus a D. D. Ciasii Venetiis transmissis, in horto Academico Lugduno Batavo productam, in ejus catalogo descripsit et delineari fecit Excell. Hermannus p. 35. Cum autem regium illud Horti Malabarici opus non in omnium manibus existat, et jam aliquoties Thee hujus novi gustui magis nonnullis abblandientis, Chinensi substituti, a variis injecta fuerit mentio, ne quod mihi primo intuitu factum, aliis quoque accidat, plantaeque exsiccatæ folia nosci haud queant, non aegre quis feret, si ex opere isto mutuo sumtam hic inseram descriptionem.

Planta est quatuor quinqueve pedum arenoso gaudens solo. Rami virides, lignosi superiori parte, ubi teneriores viridi subcaerulescentes, nonnihil pilosi. Folia, quae in ramis ac surculis proveniunt, laciniata, crassiola, in ad-versa parte, ubi costulae eminent, villosa, odoris, ut et tota planta, grati, aromatici saporis subacris. Flores sunt plano. rotundi surculorum summitatibus insidentes, quarum

quarum petala oblongo-angusta, in longitudine plicis striata, ac in illarum tractu, ubi diutius se aperuerint, se findentia, fl. va, quae singula stamine concomitantur flavo viridi, superiori parte furcato, quod ex pede folii theciformis emergit. CAPSULAE SEMINALES plano rotundae sunt ac virides, tarde se aperiunt, adeo ut quatuor quinqueve menses maneat clausae.

Hanc igitur *Botryn Mexicanam Ambrosiodem*, et *Ambrosiam Malabaricam Artemisiae* foliis odoris fragrantis, utriusque enim usus invaluit, in vicinis nostro circulis Suevico Bavaricoque, nomine Thee Romani expetunt, ejusque infuso indulgent nimium quantum, quod Magnifici Dn. Praesidis nostri aeternum venerandi, qui et plantam et semen *Botrys Ambrosiodis* mihi benivole transmissit, literis ad me datis didici. Ante multos tamen annos Dantisci jam in Regio illo Olivae Coenobio, maximo in usu fuisse *Botryn Ambrosiodem*, retulit mihi amicissimus *Dietericus*, qui dum studiis ibi pharmaceuticis incumberet, incantamenti instar plantam hanc Arnicae Clusii junctam, et in cerevisia generosa coctam, in casu ab alto, aliisque affectibus, ubi ruptorum vasorum sanguinisque extravasati metus et suspicio erat, exhibitam, opem tulisse saepius expertus est, succedente ut plurimum per alvum, viasque urinarias cruore congrumato. Firmat hanc amici experientiam externus et internus Plantae usus in India orientali Ambrosiae Malabaricae odora: sic enim de illa Hortus Malabaricus l. c. Oleo Zergelino seu Tzit-Elu et spiritui vini incocta planta *Katu tsjetti-pu*, partique affectae applicata, empyemata, et reconditos abscessus, antequam maturuerint, sanat, imprimis si ejusdem succus cum melle bibatur; cum vino adusto et Europaeo ac Malabarico Marrubio in formam Emplastri redacta, et dolenti imposita parti spasma medetur; cum melle jejune deglutita hydropem solvit.

Imprimis, qui Sinenfi hoc Mexicanum Thee substituunt, vim antiscorbuticam, sanguinisque acrimoniam et visciditatem temperandi incidendique efficaciam praedicant, felicioribus successibus adhuc confirmandam, quod ex balsamicis aromaticis, et haud

levem fragrantiam spirantibus effluviis plantae haud difficulter hariolari licet. Stupendum, modo verum, quod hac de planta Malabareses jactant, nempe aegrotantis pulvinari illa substrata, vitae mortisque auguria captari; quod si enim inde somnum non capiat aeger, vitae periculum imminere. Radicis quoque usus in Orientali India invaluit; si enim radix Oleo Sergelino incoquatur, postea panno inungatur et singulis XII. horis renovetur, purgat exanthemata; cum lacteo Nucis Indicae succo decocta radix phagadoenica curat ulcera; idem praestat pariter radicis Cortex, affectae parti impositus.

Sed plus lucis cum die afferet continuaturus Ambrosiodes *Botryos* et *Ambrosiae Malabarensis* usus. Dilabitur calamus in aliam Thee Sinensi succedaneam plantam, *Thee de Lima* dictam. Primam hujus noticiam mihi dedit Rev. P. Societatis Jesu urbem nostram transiens, meamque in arthritide anomala postulans opem. Cum nil mihi de novo hoc constaret exotico, siccaque et exsueca folia, cui plantarum classi accensenda foret, prohiberent; animus noscendi novum exoticum cupidissimus undique conquirebat fontes, vacuos tamen nullaue uspiam novi hujus Thee Peruviani nuper introducti nec vola nec vestigium. Desperans de notitia e suppellectili literaria mea haurienda, incidi in librum noviter Parisiis mihi allatum, inscriptum: *Journal des Observations Physiques, Mathematiques et Botaniques du Pere Louis Feuillée, Religieux Minime, Mathematicien et Botaniste de S. Majest. et Correspondant de l'Academie Royale de Science etc.* Obrulit scriptum hoc optatissimum *εὐρημα*, quippe Auctor Historiae naturalis scientissimus, solide exoticum novum hoc detexit, et sub nomine *Caprariae Peruvianae Agerati foliis absque pediculis*, expressit. Cum nec plantae effigies nec descriptio adhuc repertu detur, indictaque sit planta Botanicorum choro, latiali toga indutam exhibere, mecum, bona uti spero cum Lectorum *φιλοβοτανῶν* venia, constitui.

Arbusecula haec ante Annum 1709. vix in Peruvia nota, aemula Thee Sinensi quoad vires, impulit postquam innovuit, Pe-

ruanos, ut relicta illa Indiae Orientalis planta, hanc penes se nascentem indigenamque expeterent; cumque e regione illa pararem abitum, tanta jam hujus exotici infusum ingurgitandi invaluerat consuetudo, ut vix fando quis audierit frequentius, quam de novo hoc Thee succedaneo, Thee de Lima dicto.

Diffunduntur autem fruticis hujus *Radices in fibras cirratas*, quae una cum radice, cortice tenuiori coloris grysei, corpus lignosum, candicansque involvunt.

Scapus sive caulis paene sex pedum altitudinem, dimidii pollicis crassitiem attingit, in plura brachia se expandens, subdivisa in plures ramusculos, qui alternis foliis satis sibi contiguis instructi sunt. Structuram florum quod concernit, illis sunt quindecim lineae longitudinis, latitudinis tres, a basi ad mucronem usque percurrentes, ex uno latere inferne rotundatae, superne planae. Hoc latus undiquaque plures nervulos emittit, in ambitum et circuitum foliorum se diffundentes, latereque angulos efficiunt acutos, versus apicem se extendentes.

Unumquodque folium basi partem ramorum, cui adhaeret, ambit, circumferentia gaudet denticulata, inque acumen terminatur laevigatum, supra coloris laete viridantis, infra vero paululum hoc a colore discedentis, optime omnia cum figura in Tabula depicta concordant.

E Foliorum alis oriuntur postea ab uno ad tres usque pediculi rotundi, pulchre viridescentes longitudinis linearum trium, crassitiei dimidia, quorum quilibet, calice quinquepartito constat, e cujus fundo obtusus oritur tubulus, in quinque lobos circa aperturam distinctus, constituens florem album, cujus diameter quatuor linearum. Flore pereunte, quilibet lobus floris A inferne recurvatur.

Per floris centrum pistillus prodit C. figurae inversi pyri, flore deciduo tamen superstes; cum maturuit longitudine ad duas lineas cum dimidia accedens; in parte superiori ostendit stylum tubi instar cavum, qui secundum longitudinem in binas capsulas B. B. dirimitur, mediante materia albicante tanquam

quam septo intermedio junctas, quarum quaelibet ordine granulorum circularium in suis loculamentis. Grana sunt perexigua, figura ovali, coloris circa maturitatem Boetici sive fulvonigrescentis.

Hæc descriptio accuratissima novi hujus exoticici *Thee de Lima*, a Regni Peruani regia dicti, quam sedulitati viri *βοτανικωτάτου* Rev. P. Feuillee debemus. Differt tamen ab illo, quod per Regnum hoc, vicinumque Chilense conterminasque regiones expetitur, in quo non tantum Hispani, sed et indigenae paene omnes delicias quaerunt, nec sine illo diem transigere cupiunt. Vocatur vulgo *Herba sive Thee de Paraguay*, loco nempe regioneque natali, missione Rev. P. P. Societatis Jesu, quorum mero imperio terrae hic tractus subest, celebri. Herbam pariter St. Bartholomaei nominant, quoniam e vulgi traditione St. Apostolus hujus nominis Terram hanc adeundo, venenatam ante insalubremque praesentia sua beneficam salutareque reddiderit.

Cum in pulverem redigatur planta, et sic extra natale solum deferatur, cujas sit, et cui asserenda plantarum ordini *Thee de Paraguay*, haud liquet, nec ulli hucusque constitit. Rev. P. Sepp Tyrolensis et Rev. P. Böhm Bavarus, bini Societatis Jesu Sacerdotes, in Relationibus de itinere in hanc regionem suscepto luci publicae lingua vernacula commissis, tradunt, folia sicca arboris cujusdam esse, quam tamen dicere mustant, juramenti adstricti fide. Sunt pulveri huic, quem solertissimus Pharmacopoeus *Dn. Dietericus* aliquoties conspectui obrulit, fibrae foliorum duriores, quae satis arguunt, non tenellae plantae existere folia. *Woode Rogers Anglus* in itinere inscripto: *Reysee naa de Zuidzee* p. 81. palustrium udosorumque locorum, (*het groeyet in moerastige gronden*) subolem pronuntiat. *Dn. Fresier Gallus* in hodoeporico hoc demum anno edito et inscripto: *Relation du Voyage de la Mer du Sud*. T. II. p. 442. dum modum, quo Thee hoc de Paraguay hauriunt, exacte describit, ingenue fateri coactus est: *comme on ne l'apporte que secchee, et presqu'en poussiere, je ne puis point en faire la description*. Cum illi ipsi igitur,

tur, qui his in regionibus extiterē, nil certi hac de planta scribere audeant, quae qualisve illa sit; quis ἐπέχειν nobis vitio in re incertissima vertere velit, non video.

Nec mirum, Societatis prudentissimae Patres, uti in omnibus perspicacissimos, circa hanc pariter herbam, quae stuporissimam quippe illis mercem, plusquam lynceos esse. Si enim fides habenda illi Relationi, Itinerario Dn. Fresier in Belgica Editione annexae et Gallice inscriptae: *Memoire touchant l'Etablissement des Peres Jesuites dans les Indes d'Espagne*; hujus herbae de Paraguay commercium per annum spacium ultra centena Millia illius monetae, quam piastras vocant, superat; de quo summae dimidium in Missionis Paraguayicae Patres, penes quos monopolium, redundat. Fidem paene superat, quae Auctor porro addit, ex aliis mercimoniis, (imprimis auri ramentis post elaviones fluminum torrentumque collectis,) quae Missionis provincia summo Societatis imperio subiecta suppeditat, quae sum tricies mille millium colligere. Hoc equidem ulteriori probatione non indiget, omnem impendere Patres hujus herbae collectioni opem et operam, ut subditi Indici fere huic oneri succumbant, modo vera tradit Anglus Woode Rogers loco jam citato. Sic Dn. Fresier annotavit, ultra quinquaginta millia *Arovarum* (pondo est viginti quinque librarum) e Provincia Paraguay, mediante flumine de la Plata et curribus in Regnum tantummodo devehī Peruanum. Magna praeterea copia in Chilensem regionem conterminasque defertur, maximo aeraarii Regii, cui vectigalia solvenda, emolumento.

Recensentur autem binae herbae hujus species, una vocatur *Hierba de Palos*, altera melior gustuique gravior, *Hierba de Camini*, quae ultima species tantummodo in Missionis terris colligitur. Inhiant autem herbae hujus Infuso usuique Incolae regionum hactenus memoratarum paene omnes, tam Hispani, regionum domini, quam Indi ad serviendum nati, et quidem tanta aviditate, ut *P. Seppio* pro manipulo herbae de Paraguay equos bovesque obtulerint vendiderintque, tanta illis in potu

hujus Thee voluptas, ut setiviti pariter intolerabile jugum mitiget.

Modum sumendi nemo melius Domino *Fresier* descripsit, et quomodo a sorbitione potus Sinensis differat, docuit: nec enim illam, quam ex Thee Tincturam extrahit separatam hauriunt, sed poculo e cucurbita Indica Calebasse parato argenteoque obducto, (quod poculi genus *Mate* vocant,) herbam de Paraguay saccharo addito immittunt, superimfusa aqua calida, nec longiori remorae locus, cum diuturnior infusio nigricans instar atramenti evadat, ideo vix affusa aqua statim sequenti utuntur modo. Cum in pollinem redacta herba, aquae ut plurimum innatet, tubulo utuntur argenteo, in cujus extremitate ampulla parva plurimis pertusa foraminulis, mediante qua liquor, qui sugendo attrahitur penitus herbae pulverem a se demittit. Bibitur sic per hunc tubulum in orbem, ac tantum aquae reafunditur calidae, quantum bibentibus opus. Loco tubuli, lingua vernacula Hispanis Indisque *Bombilla* dicti, nonnulli pulverem Thee de Paraguay aquae innatantem, separatorio argenteo plurimis foraminulis pervio remonent. Taedium animusque Gallorum aversus in hunc cum unoquoque bibendi modum, in regione, ubi lues illa, cui India contulit nomen, endemia, causam dedit et inventionem usus tubulorum minorum vitreorum, quibus nunc in Peruviae civitate principe, Limae utuntur, alacriusque et absque ullo infectionis metu sorbent.

Per integrum diem antemeridianis pomeridianisque horis, hoc se recreant Peruviae incolae, ad minimum in die semel e cubili surgentes. Panaceae vices supplere creditur blandissima emesi, qua nulla tamen ventriculo vis infertur, saburram e ventriculo eliminando, quod jam olim in eruditissima ad Academiam nostram Relatione de novo *Americano antidisenterico* retulit μέγα δάμμα βρωτῶν *Illustriss. Leibnizius*, cuius pro dolor! obitum orbi literato universo, imprimis Academiae nostrae funestum, TIBI EXCELLENTISSIME BEHERENS luctuosum, dum haec scribo tristis fama nuntiat. Salve-

te pii Manes, et Aeterni visione beatissima aeternum perfrui mini.

Hoc porro de Paraguayico annotandum infuso, tali opus fuisse remedio gulositati Indorum: cum enim e relatione *P. Sepp* carnes vix aslas crudasque sanguinemque fundentes deorent, cruditates in ventriculo accumulari haud mirum, quas iterata hujus Thee ingurgitatio per salutarem, nec ullo modo molestum vomitum eliminare potis est; quae simul (quod aliis emeticis insolitum) teste Anglo *Woode Rogersio* l. c. evacuandi virtus, appetitum destructum excitandi vim junctam habet. Abusus tamen hujus potus illa quoque parcurit mala, quae immoderatus Vini usus comitari solet: *Het onmaatig gebruyk daarvan veroorzaakt deselfde Siektens, als het o'vertollig Drinken van Wyn doet, ut verbis Rogersii Versionis Belgicae me expediam.* In silentio repono Japonicam, plantam dulcamaram *Kook*, vel *Kuko*, aliis *Numi gussuri* dictam, cujus folia more Thee extrahenda refert Excell. *Kaempfer*. *Amoenit. Exotic. Fasc. V. p. 777.* ligustrum est spinosum, dense foliosum, folio unciali ovato, margine integro, flosculis in uno pediculo singulis vel geminis purpurascens, pentapetalis, petalis in Hyacinthi floris figuram et magnitudinem coeuntibus, baccis et semine Glycypticri.

Interim expectandum erit, usque dum futura tempora veram herbae sive Thee de Paraguay plantam nobis detegant, tandemque ex obscuritatis, in qua nunc latet, abyssu reducant, quod cum arbore fructum Cafe ferentem, jam factum, cujus ramum in Centuria IV. Ephemeridum oculis spectandum exhibuimus. Cum mentio potus Cafe injecta, in memoriam redit, novum hujus Arabicae decoctionis genus, *Cafe a la Sultane* dictum. Aequum enim fore duxi, succedaneis Thee Sinenfi hoc potus Yemanici supplementum pariter adjungere.

Luculentam ejus mentionem iniecit Auctor Itineris Arabiae felicitis, et in aulam Regis Yemen felicissimae Arabicae Provinciae, loci Cafe natalis; cui libello adjunctus Tractatus historicus inscriptus Gallice: *de l'origine et du progres du Cafe, tant dans l'Asie, que dans l'Europe; de son introduction en France, et*

ce, et de l'établissement de son usage a Paris. Hoc in scripto plurima circa nomen et ortum hujus potus aliis plane indicta et incognita ab eruditissimo *Galendio*, (cujus stupendam in linguis orientalibus studium nemini, cui haec nota eruditio, ignota est) e Scriptoribus Arabicis in Bibliotheca Regia obviis, excerpta reperiuntur, a cujus longiori recensione abstineo, cum in vernaculam nostram traducta linguam, in omnium existat manibus; sicuti et arbor, Cuse producens, in praecipuis Germaniae hortis jam laete passim adolescit et viret.

His igitur relictis, ea tantum, quae de novo Cafe genere, a *la Sultane* dicto, habet itineris Auctor, vel potius collector, uti videtur Dn. la Roque, excerpere placuit. Optimatibus Regionis (de Provincia Yemen loquitur) alius potus Cafe modus in usu, ipsis tantum peculiaris: non enim fabis seu potius fabaceis nucleis Cafe utuntur, sed corticibus tantum seu involucris; quibus pelliculas tenuissimas fabaeformem nucleum proxime investientem, Excell. Kaempfer in *Amoenit. Exotic. Fascic. I. p. 123.* furvas membranulas dictas, addunt. Praeparationis modus sequens est. Sumunt probe maturos cortices, quos diffractos in cymbio fictili carbonibus imponunt, et instar Cafe torrent, usque dum parum coloris contrahant. Eodem temporis articulo aqua in vase decoctioni destinato calescit, cumque cortex debito modo torrefactus est, bullienti aquae infunditur, cum quarta pellicularum parte; tantum autem temporis spatium, quantum ordinaria potus Cafe decoctio exigit.

Color hujus potus convenit per omnia Anglicanae Cerevisiae. Asservantur autem hi cortices in locis siccis probeque clausis, ne saporis pravitatem ab humiditate contrahant. Huic potui Yemenenses Arabes vix similem credunt ullum. Nec Gallis in Regis Yemenensis curia, et apud summos Regni ministros, alius potus quam e corticibus Cafe exhibitus, qui proinde ingenue confessi sunt, gustui potum hunc apprimè abblandiri.

Nec saccharo opus est ad deliniendum saporem: tantum enim abest, ut amaror corrigendus, ut potius dulcedo moderata

et gratissima hoc in decocto lateat. Cum haec Cafe species non ad pauperum tabernas transferatur, sed potissimum in aulis principum maneat, *Cafe a la Sultane* vocatur. In Europa et oris nostris nondum comparuere hae Ymerensium delitiae; et spes perexigua superest, illas obtinendi; cum enim parum substantiae cortices pelliculaeque habeant, metuendum multum adhuc efficaciae perdituros, usque dum ad nos per viarum longitudinem terra marique transferantur, cum praecipua virtus hujus Cafe a la Sultane in eo consistat, ut recens factum tantum hauriatur. Quae omnia, TV, EXCELLENTISSIME BEHRENS, brevibus ex Cl. Hermanno annotasti in Selectis Tuis Diaeteticis: *Cortices Cafe separatim asseruntur, non autem diu durant, unde et infusum ex iis promagnatibus paratur.*

Visis haecenus novis Thee et Cafe substitutis, imperaveram calamo Colophonem: detinuit autem paululum adhuc methodus ista, qua decocta haec aquea illis, quorum ventriculus aquam ferre recusat, per leviuseculas oleorum aromaticorum et fragrantium, olei nempe aromatici Indici, Culilawang, foliorum Malabathri, Cajeputi. Indici Cardamomi speciei, Canangae e floribus, Essentiae de Vanigl, de Nerola, praecipue Siree adspersiones et irrorationes corrigantur. Longum foret in horum oleorum plurimis incognitorum virtutes et ortus inquire, ideoque eorum examen aliis destinavi curis. Sufficiat tantum *Oleum Siree* hae vice fugientibus inspicere oculis. Supereminet hoc inter reliqua ex orientali India allata: quicquid enim in Melissa suavitatis, quicquid deliciarum in Schoenantho, quicquid citrum amoenitatis possidet, in oleo hoc Siree concentratum videtur. Nonnulli ob odoris similitudinem Melissae credere subolem, cumque Melissa Molucca, Cardiaca pariter Syriaca cognominata sit a Botanicis, nomen inde Syri vel Siree impostum credidere. Alii in Schoenanthi oleo, hujus natales quaesivere, praesertim cum Nobiliss. Herbertus de Jäger ad Dn. Rumphium, Amboinensem illum Plinium, per epistolas nuntiaverit, illum in littore Coromandel integros agros Schoenantho

confitos reperisse, incredibili odoris fragrantia, quam noctu, vel pluvioso coelo longè lateque exhalant; hinc pulvere Schoenanthi in Golconda ad detergendas utuntur manus, quippe aquae manibusque suavitatem nitoremque conciliat. Amboinenfis Schoenanthi meminit Ann. III. Dec. II. Ephém. Nat. curios. pag. 80.

Atque licet Schoenanthum officinarum sive proprie dictum haud existat planta illa, oleum Siree nobis suppeditans, ambo tamen orientalis Indiae duumviri jam laudati, in historia naturali expertissimi, post longiusculum amicumque hac de re habitum dissidium, fateri tandem coacti sunt, ad Schoenanthi genus reduci posse plantam oleo Siree praegnantem.

Est autem Juncus vel gramen, quod gramen Melissae odorum vernacula Siree dicunt, pronuntiatione parum distante a *Serj* planta Japonica, quam Petroselino foliis Alsinæ assimilat Excell. *Kaempfer*. Amoen. Fascic. VI. p. 825. Hoc gramen Melissae odore in Itinere Persico in Cochinenti agro cum caule floribusque reperit Nobilissimus *Herbertus de Jäger*, illud oleum suavissimum Siree fundens; et dolendum maxime Iconem plantae cum Amboinenfi Herbario *Rumphiano*, quae jactura omnes, quibus historia naturalis Indica curae cordique, tangit adhuc, et tanquam irreparabile damnum angit. Ingreditur autem illud oleorum suavissimum in Persia orientalibusque regionibus omnes unguentorum odoratui abblandientium illecebras. Datur quoque Schoenanthi Persica species, in cujus destillatione Excell. *Kaempferus* l.c. p. 772. camphoram copiose obtinuit.

Non possum, quin data hac Schoenanthi ejusque aemulae in oleo Siree fragrantiae occasione errorem detegam, cui planta *ἑχμάνθη* dicta ansam dedit. Cum enim materiam illam sacri Chrysmatis apud Graecos *ἑχμάνθη* ingrediatur, ceu videre est apud Reverendissimum Vabrensem Episcopum *Habertum* observ. ad Rit. Chrysmat. in Archierat. Libr. pontifical. Eccles. Graecae p. 712. et Eruditissimum *Goar* in Eucholog. Graecor. Not. ad cap. Mat. Sacr. Chrysm. p. 643. diversum diversi hac de planta sacrum Chry-

isma

spina ingrediente senserunt. *Matthaeus Sylvaticus Lexico physico Venet. Anno 1498. impress. fol. 77. Plantam esse scribit lentiscum videlicet. et secundum libr. antiquum de simpl. medicam. dicitur: spina alba et puto sic dici ἐχινάνθη ait, quod capitellum habet simile echino marino, Haec ille, haud equidem alieno a Dioscoridis sensu, quiechinum plantam non agnoscat, ἀκανθάν tamen λευκήν memorat, cujus in cacumine caput est spinosum, echino maris simile, et flores purpurei. Flores autem illi, licet nomen ἐχινάνθης etiam obtinerent, nil tamen componendo fragranti unguento profuturi essent; ἐχινός quippe sive ἀκανθα λευκή planta sylvestris est, contempta, nulloque nisi gravi odore celebris, usque adeo a consideratione hac penitus aliena, sicut et conflando μύρω inepta.*

Relicta itaque Sylvaticis sylvatica planta, audiendus insuper Eminentissimus *Habertus* l. c. ἐχινάνθη, inquit planta, aliqua, et ipso nomine videtur, cujus flos echino h. e. calice aculeato vestitus sit et munitus, sicut echini dicuntur, et castanearum calices instar echinorum sive Ergiciorum aculeis rigentes, apud Auctores tamen Botanicos sub eo nomine ignoratur. Addit in margine venerandus Vabrensiū Anstles: *Didici ab Episcopo Graeco, esse nostram caryophyllatam Giroflee.* Sed nisi firmiora afferat argumenta, quam alii hactenus Auctores citati, de planta controversa ἐχινάνθη, frustrabuntur certe expectationem nostram.

Propius ad scopum vergit correctā plantae hujus lectio, quam proposuit doctiss. *Georgius Corefius* Chienfis τῆς μεγάλης ἐκκλησίας καὶ ἰατρικῆς διδασκαλός, qui non quidem ἐχινάνθη, sed potius σχοινάνθη hic legendum esse judicat, qua voce σχοίνος ἀρωματικός, Juncus aromaticus intelligendus, cujus jam Dioscorides meminit Libr. I. c. 16. Vid. *Dn. Goar* l. cit. Quod si Siree Schoenanthi Persici vel orientalis species, uti jam a nobis demonstratum, inque Asiaticis provinciis luxuriat, non quidem crimen commiserim, si statuerem, fragrantiam olei Siree, sacrum Graecorum Chryisma, sub σχοινάνθης nomine ingredi.

Hoc denique monendum restat, non olea tantum fragrantia et aromatica, quale hactenus descriptum Siree, pro corrigenda

da cruditate, saporisque suavitate addi, sed & alia pro concilianda odoris gratia in Indiis jam sociari, id quod de foliis speciei *Sa-sanque Tsubakki* retulit toties laudatus, nunquam satis laudandus, *Kaempferus Amoenit. Fascic. V.* Cujus folia autem infuso Thee adjunguntur, est *Tsubakki*, species pumila, flore roseo rubro simplici ut plurimum pentapetalo, disco seu umbilico flamineo, fructu tripyreno pyriformi, nucis pistaciae magnitudinis, nucleis tribus albis rotundissimis. *Tsubakki* autem, cujus pumilam modo speciem recensuimus, Japonice pariter *Sa* et *Sjun*, frutex est flore roseo fructu pyriformi tricoeco. Notari meretur, fruticem hunc structura et facie sua exprimere Thee Sinense, unde orienti placet, proprio adhuc carenti, characterem mutuari a *Tsubakki*.

Sed cum calamus per tot ambages ad Plantam Sinensi Thee similem et substitutam redierit, receptui canimus huic de exoticis Succedaneis Thee Sinensis dissertatiunculae coronidem impo-
nentes; quae Tu, *VIR ILLUSTRIS*, minutula licet, sed fortasse oblectantia non despicias, potius ut perenne cultus amicitiae-
que χάρις aspicies, meque Tui addictissimum amare, quemad-
modum hactenus fecisti, haud desines. Vale.

Dabam Noriberg. ipsis Mart. Calend. 1717.

M. F. Lochner
Arch. Caesar.

